

四庫全書

子部

欽定四庫全書

子部

六藝之一錄卷六十一

詳校官中書臣陸 湘

貢外郎<sub>臣</sub>牛稔文覆勘

總校官檢討<sub>臣</sub>何思鈞

校對官中書<sub>臣</sub>陸 湘

謄錄監生<sub>臣</sub>王 宮

欽定四庫全書

六藝之一錄卷六十一

錢唐倪濤撰

石刻文字三十七

北齊帝堯碑

武平二年立有碑陰

金石錄

夫子廟碑

廢帝乾明元年立

金石錄

八分書乾明元年今在曲阜縣廟中字剝落不可辨

金石文  
字記

天柱山銘

鄭述祖撰天統元年五月立在今萊州膠水縣初後  
魏永平中鄭道昭為郡守名此山為天柱刻銘其上  
至北齊天統元年其子述祖繼守是邦復刻銘焉按  
後魏書道昭之父羲謚文靈而道昭所立羲碑乃云  
謚為文今其碑又云謚文貞皆莫可考

金石錄

蒙山碑

王思誠八分書天統五年三月金石錄

雲峯山題記

鄭述祖撰河清三年立金石畧

西門君碑

在鄴縣今臨漳鄴城故事云西門豹為令造渠渠決

漳水以溉民田因是戶口豐饒闕僕射為立

此碑寰宇記

郁久閭業碑

右北齊郁久閭業碑郁久閭其姓本出東胡見於北朝者有後魏景穆恭皇后郁久閭氏云河東王毗之妹今魏書列傳但有閭毗又有閭大肥皆云蠕蠕人蓋同族也大肥道武時歸國尚華陰公主以此碑考之業乃大肥之孫魏書於皇后傳氏姓郁久閭而於毗與大肥傳止言姓閭毗於景穆皇后為兄弟其姓不應有異使後嘗更姓史家亦當具載兼大肥之孫亦不當復用舊姓也蓋史之闕漏又碑云祖名大泥

鵲起而史作大肥碑又云業茹茹國王步渾之玄孫  
蠕蠕或稱茹茹見於前史惟魏書蠕蠕列傳自木骨  
閭以來叙其世系甚詳無名步渾者亦莫知其為何  
人也

金石錄

### 華陽公主碑

公主諱季艷蓋魏孝文帝之孫廣平王懷之女北齊  
趙郡王叡之母也按北史叡列傳其前云母華山公  
主而其後乃作華陽今此碑及北齊書皆正言封華

陽蓋北史誤也碑以河清二年八月立

金石錄

長樂王尉景碑

武平三年七月立按北齊書景字士真而碑云字副

羽蓋傳之誤

金石錄

白長命碑

武平四年立碑云公字長命而其名已殘闕長命白  
建之父也北齊書及北史白建傳皆云父名長命者

蓋齊魏間人多以字為名耳

金石錄

此碑在青州北門外大佛寺中高齊武平四年建其

書不能大佳然猶有漢晉隸分法

奔州山人藁

### 司空趙起碑

右北齊趙起碑按北齊書列傳云起天統二年除滄州刺史武平中卒于官今以碑考之起自滄州還闕

除吏部尚書判外兵省事遷光祿大夫以本官兼尚書左僕射出行懷州事轉膠州刺史封南泉郡王乃

卒史皆不書而云卒于滄州誤矣

金石錄

贈司空趙奉碑

右北齊趙奉碑奉彥深父也碑云公諱奉字奉伯而北齊書及北史但云名奉伯而已碑又云父清河府君剖符東秦著績齊土久於其職遂即家焉今為平原貝邱人也而史乃云彥深高祖難為清河太守遂家清河清河後改為平原此二事不同皆當以碑為正惟史以謂彥深本名隱避齊廟諱故以字行而碑直書為隱何哉

金石錄

宜陽國太妃傅氏碑

右北齊宜陽國太妃傅氏碑其額題齊故女侍中宜陽國貞穆太妃傅氏碑碑云太妃諱華清清河貝邱人也按北史魏置女侍中視二品然本後宮嬪御之職今以宰相母為之惟見於此傅氏趙彥深之母有

賢操事載于史

金石錄

赫連子悅清德頌

右北齊赫連子悅清德頌據北史列傳子悅為鄭州

刺史郡人請為立碑詔許之碑所載亦同而碑乃在  
今許昌者按隋書地理志潁川郡舊置潁州東魏改  
曰鄭州後周改曰許州又傳云子悅天保中為揚州  
刺史而碑作陽州者按地理志東魏於宜陽置陽州  
後周改為熊州云

金石錄

### 李威碑

不著書撰人名氏威字鍾葵趙郡柏仁人此碑字畫  
古怪不可悉辨其題額曰大齊府君之碑以天保九

年立

集古錄目

後魏曹公碑

隸書其文之亡者過半書撰之人與公之名字鄉里皆不可見公後魏人也孝昌中官至散騎常侍其子顯于齊為侍中追贈公鴻臚卿趙州刺史謚曰宣以武平元年立此碑碑之所存如此而已

集古錄目

隴東王胡長仁碑 武平二年八月

金石錄

邱珍碑 武平六年二月

金石錄

楚陽太守張樂碑

澶州

金石  
畧

在衛南縣西北二十五

里

訪碑  
錄

兗州刺史劉傑碑

澶州

金石  
畧

在衛南縣西北三十里

訪碑  
錄

隴東王感孝頌

武平二年八月立隴東王者胡長仁也武平中為齊

州刺史道經平陰有古冢詢訪耆舊以為郭巨之墓

遂命僚佐刻此頌焉墓在今平陰縣東北官道側小

山頂上隧道尚存惟塞其後而空其前與杜預所見  
邢山上鄭大夫冢無異冢上有石室制作工巧其內  
鐫刻人物車馬似是後漢時人所為余自青社如京  
師往還過之屢登其上按劉向孝子圖云郭巨河內  
溫人而酈道元注水經云平陰東北巫山之上有石  
室世謂之孝子堂亦不指言何人之冢不知長仁何  
所據而以為巨墓乎 按頌有孝子堂之語故知即

水經所載也

金石錄

孝子郭巨墓碑正書武平元年正月其文曰開府中  
兵參軍梁恭之盛工篆隸騎兵參軍申嗣邕微學搗  
藻則此碑文嗣邕撰恭之書乃後人列名之權輿也

金石文

字記

建陵山修靖館碑

天保六年十月

金石錄

權法師碑

河清二年十月

金石錄

大安樂寺碑

武平五年四月立右北齊大安樂寺碑其額題廣業

王大安樂寺碑廣業王者尉長命之子破侯也碑云  
魏末離亂長命嘗營護此寺其後破侯與其弟興敬  
復加營葺故立此碑 按北史及北齊書有尉長命  
傳今碑乃作長命又史云其卒謚曰武壯而碑乃作  
武壯當以碑為正破侯嘗仕為中書令尚書左僕射  
尚書令錄尚書事封廣業王官甚顯而史無傳

金石錄

### 崇因寺碑

陸義文姚淑八分書皇建二年三月立

馮翊王平等寺碑

武平三年八月立右北齊平等寺碑題太宰馮翊王  
定光像寶殿碑馮翊王者名潤齊神武子也碑云寺  
魏廣平王懷所立永平中造定光銅像一區高二丈  
八尺屬魏季像在寺外未果移入其後齊高祖過洛  
陽始遷像入寺至潤又增修殿宇焉據楊銜之洛陽  
伽藍記云孝昌三年十二月中此像面有悲容兩目  
垂淚三日而止其後爾朱榮北海王爾朱兆入洛陽

像皆悲泣如初每經神驗朝野惶懼其事甚異而碑

不載金石錄

### 唐邕造寺碑

隸書不著書撰人名氏北齊錄尚書事晉昌王唐邕

造四生咸覺寺之記也不著所立年月集古錄目

### 碑樓寺碑

天保八年丁丑立其碑蓋紀劉碑為首造碑之緣起

也今在本寺俗稱劉碑寺嵩陽石刻記

會善寺碑

武平七年立

嵩陽石  
刻記

大佛寺碑

此碑在青州北門外大佛寺中高齊武平四年建歐陽公嘗守青矣而不載集古錄物之顯晦固有時耶其書不能大佳然猶有漢晉隸分法文筆瑣冗是江右體中最下者內連衽與密雲爭暗旨酒共漚流競深孝子與順孫叢芳節妻共義士相望國道與華胥競高帝業共虛空比壯落霞秋水之法一篇三見能

不令覽者嘔穢耶然亦見爾時習尚如此不止庾家  
射賦舍利碑已也寺檀越為青州刺史司空公寧城  
縣高城縣開國公昌國公臨淮王婁公者當是婁定  
遠也其爵有加封有別封悉著之者其俗陋故耳碑  
陰有李北海龍興之寺四大字道偉圓健尤可賞玩  
余別搨一本置山房因附識於此

奔州山人藁

### 相里寺碑

八分書天保三年正月今在汾陽縣大相里崇勝寺

碑刻佛像其下方及兩旁皆題名

金石文  
字記

少林寺碑

正書武平元年正月今在本寺大殿前刻佛像與相  
里寺碑無異書法甚劣齋字作囊 會善寺大殿前

有武平七年十一月造像記其製亦同是年十二月

改元隆化其明年國亡矣

金石文  
字記

南陽寺碑

八分書武平四年六月今在青州府北門外龍興寺

金石文  
字記

大祖大師正覺寺重修佛殿二記

一後魏武定四年一北齊大統二年建  
金石略

二祖大師碑  
西京金石略

二聖龍華讚佛碑  
天保八年錄金石

朗公道場碑  
無年月碑文殘缺錄金石

鳴球山禪房記

不著書撰人名氏前有比邱邑子題名其後有頌亦

無書撰人名氏皆北齊人造經像立浮圖記也鳴球

山碑以河清元年立

集古錄目

三像頌

不著書撰人名氏前有比丘邑子題名豫州參軍宋元進書邑主宋士端造釋迦定光彌勒三佛石像作此頌其後有東豫州中兵外兵參軍宋歡雋等題名

者數十人河清二年

集古錄目

天保造像碑

右北齊造像記云天保四年歲次己丑按齊文宣帝  
以東魏武定八年受禪改元天保是歲庚午至四年  
當為癸酉而此記誤書癸酉為己丑其字畫不工特  
以甲子差誤恐後來疑焉因錄於此

金石錄

### 牟道志造像碑

青州刺史牟道志功曹劉徽遠天保元年歲次庚午

六月乙未朔二十九日丁亥建

復齋碑錄

郭道尊等造像記 天保四年八月

金石錄目

孫士淵造像記

天保五年九月

同上

石當門等造像碑

天保七年十二月

同上

東兗州須昌縣玉像頌

天保八年十二月

同上

皇建造像碑

皇建元年

同上

石像頌

皇建元年

同上

閻亮造像記

比邱道常書河清元年九月

同上

造石像記

河清二年九月

同上

邑義人造像記

天統二年七月

同上

趙智和造像碑 天統五年十一月

同上

造石像記

無書撰人名氏南濟陰功曹高志遠等與邑人造石

像記天統四年刻其後題名百餘人

集古錄目

鎮國大銘像碑

天統三年立右齊鎮國大銘像碑銘像文辭固無足取所以錄之者欲知愚民當晉室東遷之際事佛尤篤耳其字畫頗異雖為訛謬亦其傳習時有與今不

同者具錄之亦以此也

集古錄

唐邕造像碑

北齊散騎常侍中書侍郎李德林撰通直常侍中書舍人姚淑隸書驃騎大將軍錄尚書事唐邕造佛像

三萬二千軀以武平五年立此碑

集古錄目

臨淮王造像碑

武平四年歲次辛巳六月乙未朔二十七日辛酉建

臨淮王者婁定遠也

復齋碑錄

右北齊臨淮王像碑臨淮王者婁定遠也據北齊書和士開傳定遠與趙郡王叡謀出士開為兗州刺史未行士開納賂定遠得留復出定遠為青州刺史責叡以不臣之罪而殺之定遠歸士開所遺加以餘珍賂之乃免如史所書定遠可謂小人矣定遠本傳但云封臨淮郡王而不書其為青州者闕也

金石錄

### 造像記

武平五年張買等造像記有銘辭及題名不著書撰

人名氏

集古錄目

觀世音石像碑

武平二年八月

金石錄

開明寺彌勒像碑

武平五年八月

金石錄

賈羅侯等造像碑

武平五年十月

金石錄

宋悅和等造像記

武平七年七月

金石錄

宋使君像碑

無年月

金石錄

高隆之造像記

無年月

金石錄

龍門山造像記

正書武平六年六月立洛陽西南二十五里伊闕山亦謂之龍門左傳謂之闕塞兩山相對伊水出其中泉出石竇下注於伊固昔日神都名勝之地後魏胡太后崇信浮屠鑿岸為窟中刻佛像大者丈餘凡十餘處後人踵而為之尺寸可磨悉鑄佛像至於今未已蚩蚩之氓謂鑄佛之功可以得福報而其出於女子者尤多余嘗過而覽之既不可遍唯此武平六年者書法差可畫方格如碁局而其半亦已磨滅唐人

則多總章以後及武后年號乃知魏齊唐三代之時  
無非女主為之崇飾耳 按魏書宣武帝景明元年  
詔大長秋卿白整準大京靈岩寺石窟於洛南伊闕  
山為高祖文昭皇太后營石窟二所初建之始窟去  
地三百一十尺至正始二年終始斬山二十三丈大  
長秋王質謂斬山太高費功難就奏求下移就平地  
去一百尺南北一百四十尺又言永平中中尹劉勝  
奏為帝復造石窟一凡為三所其所謂大京靈岩寺

者在魏舊都平城今大同府城西三十里雲岡堡岩

上刻佛像無數是其作俑也

金石文字記

### 九級塔像銘

不著書撰人名氏北齊天保三年衆造九級塔像之

碑也其間多稱後魏年號

某古錄目

右魏九級塔像銘不見書撰人名氏蓋北齊時人所作也其年號見於文者三曰真君九年者後魏太武號也又曰武定四年者東魏孝靜號也又曰天保三

年者北齊年號也 按高洋以後周大統十六年受

東魏禪是歲庚午改元天保三年壬申此碑云歲在

泥灘是矣碑文淺陋蓋鄙俚之人所為惟其字畫多

異往往竒怪故錄之以備廣覽

集古錄

### 常山義七級碑

右不著書撰人名氏文為聲偶頗竒怪而字畫亦佳

往往有古法碑云常山太守六州大都督儀同三司

綦連公以天保九年造浮圖天保齊文宣年號也北

齊書有綦連猛而不為常山太守都督儀同等官不知此所謂綦連公者何人也又云常山義七級碑不著書撰人名氏文辭聲偶而甚怪書字頗有古法其碑首題云慕容儀同麴常山石氏諸邑義七級之碑其文云常山太守六州大都督儀同三司綦連公以天保九年為國敬造七級浮圖一區至天統中使持節都督瓜州諸軍事驃騎大將軍儀同三司瓜州刺史常山太守六州大都督頻陽縣開國子樂平縣開

國男慕容樂及散騎常侍驃騎大將軍前給事黃門  
侍郎繕州大中正食新市縣幹新除常山太守麴顯  
貴與功曹石子和等增成之蓋北齊時碑也慕容連公  
不見其名北齊有慕容連猛不為常山太守不知此何  
人而慕容樂官兼刺史太守並封兩縣不可詳也又  
食縣幹入官銜蓋當時之制亦不可詳也義者衆成  
之名猶若今謂義井之類也

集古錄

不著書撰人名氏七級者浮圖也義者蓋邑人為衆

所造若義井也碑首題云慕容儀同麴常山義七級之碑據碑文常山太守綦連公以天保九年造浮圖其後慕容樂麴顯貴相繼為太守而增葺之也綦連

公不知其名

集古錄目

永樂十六角題名

右永樂十六角題名不著年月列名人甚多皆無顯者莫可考究不知為何時碑其字畫頗怪而不精似是東魏北齊人所書十六角者庸俗所造佛塔其後

又書云造十六角鎮國大浮圖則知為塔矣其謂之十六角只見此碑而後魏時又有常山義七級碑蓋當時俚俗語類皆如此

集古錄

不著書人名氏刻石年月不知為何時所立永樂十六角者浮圖也題名凡二百餘人

集古錄目

### 石浮圖記

右齊造石浮圖記云河清二年歲在癸未河清北齊高湛年號也碑文鄙俚而鑄刻訛謬時時字有完者

筆畫清婉可喜故錄之又其前列題名甚多而名特  
奇怪如馮戩郎馮貴買之類皆莫曉其義若名野义  
伽耶者蓋自於浮圖爾自胡夷亂華以來中國人名  
如此者多矣最後有馮黑太者予謂太亦音捷意隋  
末有劉黑闥吳黑闥皆以此為名太闥轉寫不同耳  
然隋去北齊不遠不知黑闥為何等語也

集古錄

不著書撰人名氏建州長史馮文顯等造石浮圖以  
河清二年刻此記題名者稱維那或稱佛主左右菩

薩東西碁主其稱號甚多凡百七十餘人

集古錄目

龍華寺造浮圖碑

不著書撰人名氏據碑稱維那劉顯等于雙井村共

造龍華浮圖一區爵離一區碑以北齊武平元年立

釋氏謂寺為雀離今北朝石刻往往見之

集古錄目

造雙塔碑

天統三年十月立

金石錄

造石經并記

天統四年六月金石錄

朱彝尊記曰太原縣之西五里有山曰風峪風峪之口風穴存焉相傳神至則穴中肅然有聲風之所從出也愚者捧土塞穴建石佛於內環列所刻佛經凡石柱二百一十有六積歲既久虺蝎居之雖好遊者弗敢入焉丙午三月予至其地率土人燎薪以入審視書法非近代所及徘徊久之惜皆掩其三面未獲縱觀其全也由唐以前書卷必自傳寫甚者編韋續

竹截蒲葺柳而浮屠之言亦惟山花貝葉綴集成文學者於時窮年筆札不能聚其百一難矣石經肇自蔡邕歲久淪缺至唐鄭覃周墀復勒於京兆後唐長興中始更傳寫為雕印舍至難而就至易由是書籍日以盛顧世之學者忽其易反或東而不觀何與豈其所謂日盛者乃其所以衰與北朝之君臣崇奉釋氏故石刻經像在處多有今佛宮所棲少者百人多者數千人然通其旨者率以語言文字為無用見講

說佛經往往鄙置不屑嗚呼佛之說雖異於吾儒要  
皆彼國中之先生長者也既用其法盡棄其先生長  
者之言果何如哉九經之文在西安府儒學儒者雖  
不能盡觀而得之者咸知愛惜風峪所藏其徒雖繁  
莫有顧焉者矣是則釋氏之無人不尤甚於吾道之

衰也夫

金石文  
字記

救疾經偈

河清二年二月立

金石  
錄

佛龕碑

天統三年立武平三年刊在西京

金石略

六藝之一錄卷六十一

欽定四庫全書

六藝之一錄卷六十二

錢唐倪濤撰

石刻文字三十八

隋

禹廟殘碑

史陵正書大業二年五月右隋禹廟殘碑其文字磨

滅十五六而其末隱隱可辨云會稽郡

下缺三字

史陵書

筆法精妙不減歐虞按張懷瓘書斷云褚遂良嘗師

史陵蓋當時名筆也今此碑磨滅而僅存世之藏書者皆未嘗有非余收錄之富則遂不復見於世矣

金石

錄

老子廟碑

薛道衡撰龐恭之八分書開皇二年

金石錄

右老子廟碑隋薛道衡撰道衡文體卑弱然名重當時余所取者特其字畫近古故錄之唐人字皆不俗

亦可佳也

集古錄

孔子廟碑

仲孝俊文大業七年正月

金石錄

陳明府修孔子廟碑陳明府名叔毅字子巖陳宣帝子為曲阜令修孔子廟仲孝俊為文樹此碑碑書亦頗有漢魏分隸法而集古錄金薤琳瑯俱不載唯金石錄有之且都玄敬謂隋碑少傳自云嗜好垂三十年止得皇甫君龍藏碑姚辯志江夏磚塔記四種皇甫碑唐刻以是觀之都才有三種余所錄乃四碑并

常醜奴誌李淵記而六而皇甫智永不在其中安得

起立敬于九原而誇示之

石墨  
鐫華

右仲孝俊撰碑內言陳叔毅以陳皇諸孫為曲阜令  
因修闕里故孝俊立此以頌其功時大業七年辛未  
歲也然孝俊自書齊州秀才而下又書前吳郡主簿  
豈罷官而復應秀才舉耶書差有漢意文甚俳後頌

語云子還名賈兒多字鄭二句為古

立牘  
記

八分書大業七年七月今在曲阜縣廟中

金石文  
字記

隋平陳碑

薛道衡文江陵府

金石略

薛道衡撰在上元縣今亡

諸道石

刻錄

爾朱敞碑

開皇五年十月

金石錄

右爾朱敞碑敞者榮從弟彥伯之子也按敞傳云字乾羅而此碑字天羅傳云為金州總管而碑又為徐州總管碑文雖殘缺然班班尚可讀其述徐州事頗

多事為史家不取可也不書其官蓋闕謬也其字不  
同亦當以碑為是余於集錄正前史之闕謬者多矣

集古  
錄

源使君碑

文帝開皇元年

金石錄

呂龜碑

開皇二年十一月

金石錄

臨漳趙公清德頌

開皇六年

金石錄

北齊徐州張長史碑

開皇九年十月

金石錄

廣業郡守鄭君碑

章沛正書開皇九年

金石錄

九門縣令李公清德頌 開皇十年十二月

金石錄

右李康清德頌不著書撰人名氏文為聲偶而字畫  
奇古可愛康隴西狄道人也其碑首題云大隋冠軍  
將軍大中帥都督恒州九門縣令隴西李君清德之  
頌予在河北時遣人於廢九門縣城中得此碑字多  
訛闕其後題十一年歲在辛亥大將軍在酉二月癸  
丑朔十二月甲子建年上有二字訛闕不可識按隋  
書開皇十一年歲在辛亥其二字乃開皇也大將軍

在酉之說出於陰陽家前史不載而此碑見之

集古錄

董明府清德碑

開皇十二年十一月

金石錄

上柱國韓擒虎碑

開皇十五年十月

右韓擒虎碑不著書撰人名氏而以隋高祖為今上乃隋人所撰碑文屢言虎字獨於名下去之若避唐諱此不可知也今以碑文考隋書列傳其家世官勲大略多同惟其在齊為河長防主大都督車騎大將軍開府儀同三司白超防主轉洪超防主傳皆無之

又遷和州刺史而傳為利州皆史官之闕誤當以碑為是而傳載閻羅王事甚怪而碑無之使其實有碑不宜不書以此見史家之妄也

集古錄

梁州使君陳茂碑 開皇十八年十一月

金石錄

右陳茂碑不著書撰人名氏而字畫精勁可喜隋書列傳載茂事尤多缺謬傳云高祖為隋國公引為僚佐及受禪拜給事黃門侍郎在官十餘年轉益州總管司馬遷太府卿後數載卒而碑歷叙為高祖僚佐

時官傳雖不書可也其自黃門侍郎後又為行軍元帥長孫覽司馬又為蜀王府長史太僕卿判黃門侍郎上開府儀同三司梁州刺史等官史氏皆不書蓋其闕也又據碑茂為蜀王長史而傳為益州總管司馬碑為太僕卿而傳曰太府皆史家之謬也碑云茂

字延茂史亦闕

集古錄

文儒先生劉炫碑

大業元年

金石錄

樂州使君江夏徐公碑

郝士威撰侯彥直分書大業二年丙寅七月十五日

立在汶川石橋前

復齋碑錄

大將軍正義愍公豆盧毓碑

正書大業三年

京兆金石錄

潞城縣令段君碑 大業八年十二月

金石錄

兵部尚書段文振碑 大業八年立

京兆金石錄

處士潘徽撰歐陽詢八分書文振字元起隴西姑臧

人仕隋至兵部尚書龍岡郡公贈右僕射謚曰襄碑

不著所立年月

集古錄目

司徒觀德王楊公碑

不著撰人名氏書學博士姓名缺書雄隋之疎屬官

至司徒封觀王謚曰德碑以大業九年立

集古錄目

內史令鄭譯碑

大業十年

京兆金石錄

儀同府參軍黃山碑

不著書撰人名氏山字子岳荊州江夏人仕至儀同

孔仲衡府參軍碑以大業九年立

集古錄目

大都督袁君碑

大業十二年二月

金石錄

弘義明公皇甫誕碑

唐太子左庶子于志寧撰歐陽詢書誕字玄憲安定朝那人隋文帝末年為并州總管府長史漢王諒反誕不從見殺追贈柱國謚曰明

集古錄目

右隋皇甫誕碑余嘗得誕墓誌又得此碑以考北史及隋書列傳傳云誕字玄慮而碑志皆作玄憲傳云隋高祖受禪為兵部侍郎數年出為魯州長史開皇中復為比部刑部刑曹二侍郎遷治書侍御史為河

南道大使及還奏事稱旨令判大理少卿明年遷尚  
書右丞以碑志參攷誕自司徒主簿出授長史俄除  
益州總管府司法徵授比部侍郎蓋未嘗拜兵部而  
其為河北河南安撫大使乃任右丞時皆史家之謬  
惟墓志稱誕嘗為司徒主簿而碑不載傳與墓志皆  
云為魯州長史而碑作廣州則疑碑之脫漏墓志乃  
葬時所述然碑亦貞觀中其子無逸追建不應差謬  
而不同何也

金石錄

隋光祿大夫皇甫君碑唐于志寧文歐陽詢書骨氣  
勁峭法度嚴整論者謂虞得晉之飄逸歐得晉之規  
矩觀此其振發動盪豈非逸哉非所謂不踰矩者乎  
初學者師此以立本而後入虞入永入鍾王有所持  
循而成功不難也

東里集

率更書皇甫府君碑比之諸帖尤為險勁是伊家蘭  
臺發源石刻在西安雖小苔剝差可誦耳皇甫君名  
誕仕隋死於漢王諒之難者卹典殊不薄後以子無

逸貴於唐始克樹碑噫逝者有知能無麥秀之歎乎

弇州山人葉

右隋柱國左光祿大夫皇甫誕碑于志寧撰歐陽詢  
正書金石錄謂嘗得誕墓志又得此碑與北史及隋  
書參攷以正史氏之謬又謂碑與墓誌所述亦有不  
同墓誌今不得見碑在陝西西安府學不甚缺壞蓋  
歐書中之得意者也

金薤  
琳瑯

皇甫君名誕歿于隋而碑立于唐以子無逸貴也于

志寧撰歐陽詢書王元美謂比之信本他書尤為險  
勁是伊家蘭臺發源余謂其勁而不險特用筆之峻  
一變晉法耳可為楷法神品碑舊在鳴犢鎮今在西  
安府學戊子余君房督學作亭覆之丙申亭圯壓碑  
中斷碑故剝二十餘字至是又亡其五十餘字余所  
收乃未斷時搨本深寶惜之

石墨  
鐫華

尚書左僕射元長壽碑 大業八年正月

右隋元長壽碑虞世基撰歐陽詢書按隋史壽開皇

中為尚書主爵侍郎而碑云主爵郎碑云從晉王伐  
陳時兼揚州長史授行軍總管長史平陳遂為揚州  
總管府長史遷尚書左丞而史但云自元帥府屬平  
陳入為左丞耳又為太常少卿時兼雍州司馬史亦  
不載其卒贈尚書左僕射光祿大夫封博平侯而史  
但云贈右僕射皆其闕誤史云壽在周封儀隴縣侯  
而碑作儀龍侯今按隋書地理志有儀隴縣屬巴西  
郡而無儀龍未知孰失也

金石錄

梁洋德政碑

右隋梁洋德政碑在今蔡州新息隋開皇十一年行  
參軍事裴玉與州人為息州刺史梁洋建寶塔表德  
政碑按隋書志後周於新息縣置息州至大業中州

廢也

集古錄

不著書撰人名氏隋息州參軍裴玉等為刺州梁洋

建塔以表德政碑以開皇十一年立在新息縣

集古錄目

九門縣令鉗耳文徹清德頌

右不著書撰人名氏其碑首題云大隋恒山郡九門  
縣令鉗耳君清德之頌大業六年建字畫有非歐虞  
之學不能至也碑云君名文徹華陰朝邑人也本周  
王子晉之後避地西戎世為君長因以地為姓曾祖  
靜仕魏為馮翊太守祖朗成集二州刺史父康周荆  
安寧鄧四州總管別駕安陸龍門二郡守而前史皆  
不載碑在今廢九門縣中余為河北轉運使時求得

之集古  
錄

鉗耳君名文徹本出西戎後為華陰朝邑人隋煬帝時為恒州九門令遷梁州司馬將去縣民刻石頌德

碑以大業六年立在廢九門縣中

集古錄目

梁令梁執威德政碑

在絳州

金石略

海陵公賀若誼碑

此碑正書方整精健是唐初諸人前茅在興平縣文廟宋人磨其陰刻夫子廟記而此文止存十之三聞曾完好一縣令苦貴人之摹搨使捶去之誼事見隋

史茲不贅云

石墨  
鷄華

在興平縣崇寧寺

天下金  
石志

安喜公李使君碑

奉天鄉人掘得此碑樹之上官村墓前余過搨二紙  
隸書亦自道逸而碑頗完使君涼武昭王之後祖景  
超員外散騎侍郎父通逸使持節東南道都督狄道  
縣開國子季父琰之出牧荊郡使君仕開府儀同三  
司使持節邛州諸軍事邛州刺史安喜縣公開皇十

六年卒十七年樹碑皆歷歷可讀而獨闕使君名按使君與唐同宗官亦不卑隋史無傳遂不可攷使君祖父季父獨琰之見魏書耳因知史官闕略如此類者不可勝計也

石墨  
錫華

八分書開皇十七年二月今在馬嵬堡北五里

金石  
文字

記

### 張文詡碑

張文詡河東人博覽羣書特精三禮蘇威勸令從官

固辭仁壽末策杖歸終於家鄉人為立碑頌號曰張

先生

北史本傳

楊素碑

大業二年素卒帝下詔立碑以彰盛美

北史本傳

令狐熙碑

令狐熙拜滄州刺史吏人追思相與立碑頌德

北史本傳

房彥謙碑

房彥謙為長葛令有惠化百姓立碑頌德

北史本傳

寧遠將軍裴文基墓誌

開皇十年

京兆金  
石錄

開府儀同三司崔弘安墓誌

開皇十五年

京兆金  
石錄

驃騎將軍楊端墓誌

開皇十五年三月

金石錄

車騎將軍盧瞻墓誌

開皇十六年十一月

五原國太夫人鄭氏墓誌

開皇二十年二月

金石錄

賈使君墓誌

仁壽元年七月

同上

張光墓誌

仁壽元年八月

同上

大將軍梁恭墓誌

仁壽元年十月

同上

開府儀同三司賈義墓誌

開皇十八年薨以仁壽元年二月十八日葬于咸陽

縣

復齋  
碑錄

上儀同楊縉墓誌

許善心撰序虞世基製銘世以為歐陽詢書年月殘

缺

復齋  
碑錄

齊國太夫人楊氏墓誌 開皇十年三月

右隋齊國太夫人楊氏墓誌云夫人字季姜僕射高

頰母也隋書頰傳云頰以母憂去職開皇二年伐陳  
詔頰節度諸軍據此頰之丁內艱蓋在開皇初今以  
墓誌考之楊氏之卒乃在十年傳稱頰既貴其母常  
誠以遠禍後頰竟以危言為煬帝所誅如其言可謂  
賢矣常恨不著其姓氏今乃見於此云

金石錄

周羅暉墓誌 徐敬撰大業元年四月

右隋周羅暉墓誌無書人姓名而歐陽率更在大業  
中所書姚辨墓誌元長壽碑與此碑字體正同蓋率

更書也往時書學博士米芾善書尤精于鑒裁亦以  
余言為然羅暉名將隋史有傳今以墓誌考之羅暉  
在陳自鍾離太守遷秦郡而史不載又史云開皇中  
自幽州刺史轉涇州母憂去職復起授幽州遼東之  
後徵為水軍總管進為上將軍而墓誌自幽州為水  
軍總管進為上將軍然後為涇州其遷拜次第皆不  
同又史云拜東宮右虞候率而墓誌為左監門率史  
云轉右衛率而墓誌為右監門武候率史云自右武

候大將軍進授上將軍而墓誌不載蓋未嘗拜此官也皆當以墓誌為據

金石錄

黃門侍郎柳旦墓誌 大業六年十一月

右隋柳旦墓誌以考隋史列傳其始終事迹皆同惟傳云攝判黃門侍郎而墓誌云檢校黃門侍郎小異耳又墓誌載誕六子燮楷則綽濬亨而元和姓纂與唐史宰相世系表皆云旦五子而闕其第五子濬亦

當以墓誌為是也

金石錄

賀蘭才墓誌 大業三年二月

金石錄

西平太守上官政墓誌 大業六年三月

金石錄

海州刺史劉瑤墓誌 大業六年十二月

金石錄

開府鄭煥墓誌 大業六年十二月

金石錄

大將軍安陽肅公姜濟墓誌

正書不著書人名氏公諱濟字彭子定州博陵人仕

至開府儀同三司左領軍大將軍大業元年四月薨

於私第以三年十一月葬於京北郡

碑缺

縣平陵鄉

復齋

碑錄

屯衛大將軍姚辯墓誌 大業元年十月

右隋左屯衛大將軍姚辯墓誌銘虞世基撰歐陽詢  
正書志稱辯精於邊事屢立大功蓋老將也其官至  
大將軍而死諡恭公爵亦尊矣而隋史不為立傳向  
非率更之書後世不復知有辯此古人墟墓之文所

以必託之名筆豈無意耶

金薤  
琳瑯

按此銘金薤琳瑯載其全文闕四十餘字今余所得

本全

金石文  
字記

齊郡太守元整墓誌

大業九年

京兆金  
石錄

光祿卿徐寔墓誌

大業九年

京兆金  
石錄

北絳公夫人蕭氏墓誌

在京北府

金石  
略

包愷墓碣

包愷精漢書教授數千人卒門人起墳立碣焉

北史  
儒林

傳

王威猛墓誌

不著書撰人名氏威猛字繼叔琅邪海曲人官至候

衛虎賁郎將碑以大業中立

集古錄目

榮澤令常醜奴墓誌

醜奴始平人為都督榮澤令大業元年卒誌在興平

崇寧寺壁間為童子摩挲幾乎余搨一紙書亦不大

佳但以隋物存之興平即古始平今不知墓所在

石墨

錫華

正書大業三年八月今在興平縣崇寧寺墓之有誌

始自南朝南齊書云宋元嘉中顏延之作王球石誌  
素族無碑策故以紀德自爾以來王公以下咸共遵  
用今之傳於世者惟此及梁羅二志為隋代之文爾

金石文

字記

鷹揚郎將義成子梁羅墓誌

正書大業四年八月今在西安府城外杜曲古人之  
字未必皆工而後人貴之者以其所從來遠也此志  
正書猶帶八分凡隋以前之書法多如此而書志之

人未必其通文義也鷹揚之字出詩大明之篇而此志前作陽後作楊宣政元年周武帝之號而書作正汪汪萬頃作傾羽儀作議降疾不瘳作抽與乾坤而齊固作個禁旅之禁作樂樊川之樊亦作樂此皆文理之至謬豈可以其出於古而不論哉

金石文字記

桂州總管侯莫陳穎墓誌

以下三碑俱唐初立以其隋時人附於隋

右隋侯莫陳穎墓誌隋書有穎傳以其事考之多合惟傳言穎謚曰定而誌不載按誌云公第四子尚書

考功郎中乾會而傳作虔會乾虔義理皆通然余嘗  
得乾會碑乃云名肅字乾會元和姓纂所載亦同疑  
其以字行耳蓋隋唐間人多如此

金石錄

正書不著書撰人名氏君諱穎字遵道彭城人大業  
六年為南海太守九年十月薨於郡治唐武德八年

遷葬於雍州咸陽縣

寶刻叢編

衛尉卿竇慶墓誌

右隋竇慶墓誌慶曾祖畧祖溫善父榮定北史及北

齊後周隋書皆有傳諸史皆云慶祖名善而慶之兄  
抗墓誌乃云名溫唐書宰相世系表以為善一名溫  
今此誌名溫善皆不可考慶大業中仕為衛尉卿史  
云為羣賊所殺而墓誌云為盧圓月所殺墓誌貞觀  
四年刻其小楷工妙不減歐虞惜其不著名氏也

金石

錄

處士羅靖誌

處士以仁壽四年五月二十三日終夫人張氏於唐

龍朔二年終合葬於習池

復齋  
碑錄

襄陽有隋處士羅君墓誌曰君諱靖字禮襄陽廣昌人高祖長卿齊饒州刺史曾祖弘智梁殿中將軍祖養靖學優不仕有名當代碑字畫勁楷類褚河南然父子皆名靖為不可曉拓拔魏安同父名屈同之長子亦名屈祖孫同名胡人無足言者但羅君不應爾也

容齋  
隨筆

隋處士羅君碑字畫可喜而不載書人名氏初余至

襄州刺史館余於州治之東地有水龕塵網如積掃  
滌而視之此碑也遂撫得之去年春余復有荆襄之  
行訪此碑則曰卒史輩竇持不虔碎而棄之矣可謂  
不幸也昔林邑王楊邁死子咄立慕其父德改名揚  
邁昭穆兩世而一名余每笑歎謂天下事何所不有  
今羅君之父名靖而羅君亦名靖殊不可曉羅君以  
仁壽四年卒夫人以龍朔四年葬自隋仁壽四年訖  
唐龍朔二年則夫人之守志蓋五十有九年以壽終

亦可尚矣

集古  
後錄

### 興福寺碑

張萊撰龐夔正書開皇二年二月立

金石  
錄

### 興國寺碑

隋內史李德林撰襄州祭酒從事丁道護書隋文帝  
父忠當魏周之際常將兵南定漢襄及文帝即位建

此寺以祈福碑以開皇六年正月立

集古  
錄目

襄州興國寺碑丁道護書啓法寺碑一興國寺碑一

皆隋開皇中立啓法寺今為龍興寺興國寺今為延慶寺在望楚山歐陽永叔云興國寺碑不知所在特見其摹本於太學官楊衷家而此碑陰又有道護書襄州鎮副總管府長史柳止戈而下官號姓名其字尤可喜得之自余始世蓋未有傳之者也

南豐集古錄

大興國寺銘隋內史李德林撰丁道護書隋開皇間以襄州鳳林山鳳林寺為大興國寺至唐會昌五年武宗用道士趙歸真說大毀佛寺復僧尼為民而寺

廢懿宗朝州刺史蔣係請復寺為延慶寺從之建炎  
初寺為灰燼此碑獨歸然露立在今府城東南十里  
歐陽公頃嘗見墨本於學官楊君家欲求其本不知  
碑所在曾南豐謂延慶寺在望楚山非也城西南三  
里有山聳然曰尖山者其上可以望見鄆城宋元嘉  
中武陵王駿更名望楚余登望楚者屢矣烏覩所謂

延慶者哉

集古  
後錄

興國寺碑陰

右隋興國寺碑陰丁道護書道護所書興國啓法兩  
寺碑皆在襄陽歐陽公嘗得啓法寺碑列於集古錄  
中而於太學官楊褒處見興國寺碑以不得入錄為  
恨今碑陰又有襄州鎮副總管劉止戈以下十八人  
姓名字畫尤完好歐陽公所未見也蔡君謨題其後  
云在杭州日坐有客曰小說稱丁真水草永固知名  
丁何人也予謂道護豈其人耶按法書要錄丁覘與  
智永同時人善隸書世稱丁真水草非道護也

金石錄

興國寺碑陰有柳止戈而下十八官姓名亦道護書  
蔡君謨題其後云在杭州日坐有客曰小說稱丁真  
永草永固知名丁何人也道護豈其人耶趙德夫按  
法書要錄曰非道護丁覘與智永同時世稱丁真永  
草德夫之言是矣余謂丁覘在時必未得此聲西臺  
既陷簡書湮散丁尋卒於維揚妙蹟實為難得已而  
智永師盛以草書名江東然後人以永草配丁真也  
丁覘洪亭人梁孝元在荊州凡書記皆其筆當時尚

為之語曰丁君十紙不敵王哀一字獨顏之推愛而  
寶重之蕭子雲問典義惠編曰君王賜書殊為佳手  
姓名為誰編以覘對子雲歎曰不為世所稱亦奇事  
事見顏氏家訓恐忘之聊附于此

集古  
後錄

### 龍藏寺碑

右齊開府長兼行參軍九門張公禮撰不著書人名  
氏字畫道勁有歐虞之體隋開皇六年建在今鎮州  
碑云太師上柱國大威公之世子左威衛將軍上開

府儀同三司使持節恒州諸軍事恒州刺史鄂國公  
金城王孝遷奉勅獎州人一萬共造此寺其述孝  
遷云世業重於金張器識逾於許郭然北齊周隋諸  
史不見其父子名字不詳何人也

歐陽文忠集

右隋龍藏寺碑齊張公禮撰龍藏寺已廢此碑今在  
常山府署之門書字頗佳第不見其人姓名爾碑以  
隋開皇六年立後題張公禮尚稱齊按周武帝建德  
六年虜齊幼主高常齊遂滅後四年隋建開皇之號

至六年齊滅蓋十年矣公禮尚稱齊官何也

集古錄

齊開府參軍張公禮撰不著書人名氏隋太師上柱國大威公世子恒州刺史鄂國公金城王孝遷奉勅率州民萬人共立此寺碑首題曰鄂國公為國勸造龍藏寺碑以開皇六年立寺廢碑今在真定府門下

集古

錄目

右隋龍藏寺碑齊張公禮撰而不著書人名氏集古錄謂寺已廢碑在常山府署之門常山即今之真定

予近以使事過之聞府治東二里龍興寺有古銅佛  
一軀崇七十二尺閣之覆者崇百有三十尺與太守  
同年李君往遊其間見殿前一古碑其趺已沒土中  
讀之乃公禮文歐公謂寺廢與碑在常山府署蓋未  
嘗親歷其地故誤書耳

金薤  
琳瑯

龍藏寺即今真定府龍興寺碑尚存碑書道勁亦是  
歐虞發源但碑立于開皇六年是時齊滅已久而張  
公禮尚稱齊官何也又碑稱造寺者太師上柱國大

威公之世子使持節左武衛將軍上開府儀同三司  
恒州諸軍事恒州刺史鄂國公金城王孝遷史傳逸

之遂無所攷

石墨  
錫華

龍藏寺碑張公禮撰正書今在真定府龍興寺大殿  
內其後為天寧閣九間五層高一百三十尺中有觀  
音銅像高七十二尺四十二臂各有所執之物俗謂  
之大佛寺也碑為隋開皇六年恒州刺史鄂國公金  
城王孝遷立而其末乃云齊開府長兼行參軍九門

張公禮撰齊亡入周周亡入隋而猶書齊官蓋君子

之能不降其志而其時之人亦不以為非也

金石文字記

安定縣官寺碑

開皇八年五月

金石錄

太平寺碑

開皇九年八月

金石錄

右太平寺碑不著書撰人名氏南北文章至於陳隋其弊極矣以唐太宗之致治幾乎三代之盛獨於文章不能少變其體也豈積習之勢其來也遠非久而衆勝之則不可以驟革也是以羣賢奮力墾闢除莠

至於元和然後蕪穢蕩平嘉禾秀草爭出而葩華美  
實爛然在目矣此碑在隋尤為文字淺陋者疑其里  
巷庸人所為然視其字畫又非常俗所能蓋當時流  
弊以為文章止此為佳矣文辭既爾無取而浮圖固  
吾儕所貶所以錄於此者第不忍棄其書爾

集古錄

### 午夕寺碑

開皇十年五月八日息州刺史梁洋建

復齋碑錄

### 涇州興國寺碑

李德林撰開皇十年十二月

金石錄

化善寺碑

開皇十五年正月

右隋化善寺碑在徐州碑陰有郎餘令題記云隋尹

式撰余元祐間侍親官彭門時為兒童得此碑今三

十餘年矣

金石錄

蒙州普光寺碑

仁壽元年七月

右蒙州普光寺碑蒙州者漢南陽郡之育陽縣也應

劭曰育水出弘農盧氏南入于沔故後人於育加水

為滄陽西魏置蒙州隋仁壽中改為滄州又為滄陽  
郡唐為縣屬金州碑仁壽元年建猶曰蒙州既而遂  
改滄州矣碑無書撰人名氏而筆畫道美玩之忘倦  
蓋開皇仁壽以來碑碣字書多妙而往往不著名字  
惟丁道護所書常自著之然碑石在者尤少余每與  
蔡君謨惜之自大業以後率更與虞世南書始盛既  
接於唐遂大顯矣

集古  
錄

### 啓法寺碑

周彪文丁道護正書仁壽二年十二月

金石錄

此書兼後魏遺法與楊家本微異隋唐之交善書者衆皆出一法道護所得最多楊本開皇六年去此十

七年書當益老亦稍縱也

蒲陽蔡襄記蔡忠惠公集

右啓法寺碑丁道護書蔡君謨博學君子也於書尤稱精鑒余所藏書未有不更其品目者其謂道護所書如此隋之晚年書學尤盛吾家率更與虞世南皆當時人也後顯於唐遂為絕筆余所集錄開皇仁壽

大業時碑頗多其筆畫率皆精勁而往往不著名氏  
每執卷惘然為之歎息惟道護能自著之然碑刻在  
者尤少余家集錄千卷止有此爾有太學官楊褒者  
善收書畫獨得其所收興國寺碑是梁貞明中人所  
藏君謨所謂楊家本者是也欲求其本而不知碑所  
在然不難得則不足以為佳物古人亦云百不為多  
一不為少者正謂此也

集古  
錄

隋儀同三司周彪撰襄州從事丁道護書隋開皇初

詔後周所毀佛寺皆復建之州人共造此寺刺史韋世康名之曰光福禪房後又改為啓法寺以仁壽二年十二月立并邑人趙勵等題名

集古錄目

啓法寺碑開皇中立啓法寺今為龍興寺在襄陽城

西

南豐題跋

啓法寺碑仁壽二年建曾南豐以為開皇中立誤也道護之書見於世者獨興國寺碑與此碑爾二碑俱在襄州前年春訪碑于寺止得興國寺碑而啓法之

碑無有此可珍也

集古後錄

脩禪道場碑

徐放書在台州

碑帖考

隆聖道場碑

虞世南撰并行書大業九年十二月

金石

錄

隋虞世南撰并書周建德六年隋高祖擁旄於此至大業九年伐叛海東旋師有詔改為高陽郡記王業之所興設隆聖道場為高祖祈福大業九年十二月

立此碑

寶刻叢編

高陽郡隆聖道場碑隋秘書郎虞世南撰次書石世南以書名隋唐間此碑最顯世競以摹本傳今其碑在定州龍興寺或疑為摹本以高陽之郡在中山郡也今考大業雜記九年閏月幸博陵昔為定州先皇歷試所基遂改為高陽今世南謂大業龍集癸酉有詔改郡以記王業所興然則與雜記合矣夫釋老之教行乎中國自漢晉以逮齊魏僧尼為寺道士女冠為觀隋改法雲慧日二道場金洞玉清二玄壇貞觀

十二年復寺觀舊名則當世南時隋謂道場必矣唐志  
言定州博陵本高陽郡義寧元年析高陽為恒州武  
德四年以高鄭博野苑為蒲州貞觀初以鄭高陽歸  
瀛州天寶元年復以博陵郡為定州而國朝乃以瀛  
州為高陽郡以定武之郡歸中山則地隨改矣其興

廢因革如此知碑非後世所摹也

廣川書跋

西林道場碑 歐陽詢撰大業十三年四月

大業十三年廬山西林道場碑渤海公撰公為隋太

常博士時作不著書人名氏而字法老勁疑公之書也西林道場者偽趙將竺氏捨俗出家名曇現始居於此晉太和二年光祿卿陶範始為現弟子慧永造寺而號西林按兩京記隋嘗更名佛寺為道場此碑大業十三年建也顏魯公寓題碑陰百餘字尤奇偉今附於碑後

歐陽文忠集

右西林道場碑渤海公撰公在隋為太常博士時作不著書人名氏字畫道勁世或以為公自書公時年

尚少又字法與公書不同不知何人書也按韋述兩京記隋改名佛寺為道場此碑大業中建故謂之道

場也

集古錄

隋太常博士歐陽詢撰不著書人名氏筆畫遒勁或以為公自書按兩京記隋改寺為道場碑以大業十

三年立在廬山西林寺

集古錄目

右隋西林道場碑題太常博士歐陽詢撰而不著書人名氏余家藏隋姚辯墓誌元壽碑皆率更在大業

中為博士時所書與此碑字體絕不類知其非率更

書也

金石錄

右隋廬山西林道場碑歐陽率更撰而不云何人書  
要當出於一手昔唐韋絢錄劉禹錫嘉話載率更行  
見索靖所書碑下馬布毯坐觀三宿而後去又云率  
更不擇紙筆皆能如意惟其好古如前說之勤是以

肆律無不臻妙理當然矣

益公題跋

汎愛寺碑 大業五年

墨池編

隋汎愛寺碑李百藥自書字畫老勁可喜集古錄

善寶寺碑

大業中立在東京

金石略

大業中安鄉司功程式等同修佛像立此碑訪碑錄

楞伽寺碑

書人名氏未詳碑甚古在蘇州

天下金石志

隋人書碑甚古在蘇州府之西南橫山古今碑刻記

文帝舍利塔銘

李百藥撰書人姓名殘缺大業五年四月立金石錄

修舍利塔碑

開皇九年九月

金石錄

趙君寶塔碑

開皇十三年十月

金石錄

舍利塔銘

仁壽二年三月

金石錄

賈春英浮圖碑

開皇十二年七月

金石錄

栖巖道場舍利塔碑

仁壽二年立

金石錄

願力寺雙七級浮圖銘

仁壽二年正月

金石錄

願力寺舍利寶塔銘

仁壽三年四月

金石錄

江夏縣緣果道場磚塔下舍利記

右隋江夏縣緣果道場磚塔記無書撰人名氏記中  
載舍利瑞應之事不一此非吾所知但隋碑之傳世  
絕少以予嗜好之篤集錄之勤三十年間所得隋碑

惟皇甫府君龍藏寺姚辯墓誌及此而已

金薤  
琳瑯

隋人撰近時民家掘得之

輿地  
碑目

隋願力寺舍利寶塔函銘

右隋願力寺舍利寶塔函銘仁壽三年相州刺史薛  
胄建唐劉禹錫集載僧靈澈詩有云經來白馬寺僧

到赤烏年禹錫稱其工因讀此銘序亦以白馬之寺對赤烏之年乃知前人已有此語蓋隋唐間文體大率以偶灑為工雖格力卑弱然用事親切時有可喜

也

金石錄

### 天寧寺塔幢

塔高十三尋塔前一幢書體道美開皇中立

帝京景物略

### 舍利石塔銘

在鄂州勝緣寺仁壽初立

輿地碑目

幽州智泉寺舍利塔銘

仁壽元年内史令王臣暕宣

天下金石志

同州塔銘

八分書仁壽元年十月今在同州

天下金石志

恒嶽寺舍利寶塔銘碑

大業元年

金石錄

隸書不著書撰人名氏隋文帝仁壽元年建舍利塔

於恒嶽寺詔吏民皆行道七日人施十錢又自寫帝

形像於寺中大業元年長史張果等立碑

集古錄目

橫山頂舍利靈塔銘

嚴德盛製文魏瑗正書大業四年九月八日立

復齋碑錄

寶積寺塔銘

在吳縣橫山隋人所書碑石全好字畫秀整絕類虞

褚

輿地碑目

趙紹等造像碑

北齊造像碑劉之遴撰開皇四年四月立

金石錄

北齊仁州刺史黃門郎劉逖之撰不著書人名氏邑

人趙紹等造佛像記也不著所立年月據其記稱大

齊而其後又題曰隋潞州司馬薛邈侍佛乃知隋人

所追建也

集古錄目

鄂國公造鎮國大像碑 開皇十一年九月

金石錄

賈普智造像碑 開皇十一年

金石錄

正解寺造像碑 劉昇卿撰開皇十二年四月

金石錄

隋隨昌劉鼎卿撰不著書人名氏寺本後魏宣武帝

以七廟所立謂之七帝寺至周被廢隋文帝時復興

佛法定州贊治崔子石捨以為寺賜名正解碑以開

皇十二年四月立

集古錄目

劉景韶造像碑 開皇十三年四月

金石錄

造像碑 開皇十五年九月

金石錄

李氏像碑 開皇十六年七月

金石錄

王明府造像碑 開皇十七年八月

金石錄

唐高祖造像記 太宗造像記附大業二年二月

金石錄

隋鄭州刺史李淵造石像記大業二年三月在滎陽

縣訪碑  
錄

信行禪師碑

僧法綝撰開皇十四年正月

京兆金石錄

聖衆寺真應禪師碑

不著書撰人名氏其額曰聖衆寺真應禪師妙德碑  
真應禪師者姓蓋氏漢蓋延之後碑以開皇七年立

集古錄目

李淵為子世民祈疾記

此唐高祖也記稱鄭州刺史李淵為男世民目患先  
於此寺求佛蒙佛恩力其患得損敬造石碑像一鋪  
願此功德資益弟子男合家大小福德興足永無灾  
障弟子李淵一心供養後署大業二年正月八日按  
是時太宗才九歲耳而史稱高祖為譙隴岐三州刺  
史不曰鄭州此亦可以證史之闕

石墨  
鐫華

行書大業二年正月今在鄆縣草堂寺

金石文  
字記

同州塔銘

維大隋仁壽元年歲次辛酉十月辛亥朔十五日辛  
丑皇帝普為一切法界幽顯生靈謹於同州武鄉縣  
大興國寺奉安舍利敬造靈塔願太祖武元皇帝元  
明皇后皇帝皇后皇太子諸王子孫等并內外羣官  
爰及民庶六道三塗人非人等生生世世值佛聞法

永離苦空同昇妙果

金石文  
字記

益州至真觀碑

辛德源撰劉曼才正書開皇十二年六月

金石  
錄

紫微觀碑

在巢縣開皇十四年劉穎製銘其碑皴剝難讀

輿地碑目

顯崇觀碑

大業五年為至尊皇后祝壽所記在鄆鄉縣

輿地碑目

平都治碑 大業十一年八月

青城山碑

在常道道觀軒轅石龕之下大業七年立太常博士

陰道文

輿地碑目

天龍山碑

八分書開皇五年今在太原縣天龍寺

金石文  
字記

潞州頌德碑 開皇十年十一月

金石錄

梁公堰紀功碑

在河陰縣西二十里本漢平帝汴河決壞至明帝永  
平十二年乃令王景理渠隄其後通塞各計朝代隋  
開皇七年使梁睿增修古堰遏河入汴立碑紀功

寰宇記

記

景陽井欄銘 八分書開皇中江陵府

金石略

辱井有篆文共十八字在井石檻上不知誰為文又

有景陽樓下井銘又有陳後主叔寶辱井記云江寧

縣興嚴寺井石檻銘莫知誰作也

元豐類藁

隋煬帝作文帝開皇九年煬帝以晉王為元帥伐陳滅之後主與張麗華自投於井帝為銘刻於石井欄

以為戒

集古錄目

序云開皇九載余奉聖略孟春正月至於為都叔寶

衆叛逃形天地乃與愛姬張麗華等投于此井系之  
以銘隸于石檻之側者晉王廣也

集古  
後錄



六藝之一錄卷六十二